

Professiuns tecnicas che fascineschan

Giuenils ell'elecziun dalla clamada han giu la caschun d'emprender d'enconuscher las professiuns tecnicas dalla Distec SA a Mustér la mesjamna suentermiezdi. Quella revista da professiuns ei in da plirs arranschaments che l'interpresa organisescha per propagar sias clamadas e pazzas d'emprendissadi.

Hans Huonder/FMR

Quater giuvens han nezegiau la caschun d'emprender d'enconuscher empau pli detagliadamein la Distec SA e surtut las professiuns da polimecanist e mecanist da producziun. «Nus essan cuntents cun quella participaziun e sch'in da quels quater sedecida da far tier nus igl emprendissadi, essan nus gia fetg cuntents», di *Pierino Bisquolm* che meina la partizun dils emprendists dapi rodund quater onns. Sper quella revista organisescha la Distec SA era orientaziuns ellas scolas e separticipescha al Pass da vacanzas.

Buca mintg'onn tuttina

La finamira dalla Distec SA ei d'instruir en tut denter 15 e 20 emprendistas ed emprendists. Ils davos onns ei quei diember buca vegnius contonschius, il mument eis ei endisch ella partizun tecnica. Fetg bein vesa ei denton ora pigl onn vegnent. «Nus survegnin tschun novs emprendists per las professiuns tecnicas, leutier in'emprendista mercantila. Quei ei secapescha fetg bien», puntuescha Pierino Bisquolm. Igli interess per las professiuns tecnicas dalla Distec SA svarieschi dad onn tier onn. In onn hagien ins pli biars, in auter onn pli paucs.

Grond spectrum da products

La gronda part dils emprendists deriva dalla Surselva, mo ils davos onns han era giuenils dil contuorn da Cuera e Landquart absolvii lur emprendissadi a Mustér. Il motiv persuenter ei segiramein la gronda varietad da products dalla Distec SA. Ella producescha numnadamein per l'industria medicinala entochen l'aviatica e l'astronautica. «In aschi grond spectrum da secturs da producziun sco nus han paucs. In dils motivs persuenter ei segiramein era che nus disponin dils certificats corrispondents per astgar producir tocca per biars secturs specials», di Pierino Bisquolm. El constatescha denton era: «Survegnir emprendists ei fetg grev. Dad ina vart ein las annadas bia pli pintgas che pli baul, da l'autra vart han ils giuenils biares pusseivladads d'emprendissadi cheu ella regiun.»

Menaschi da precisiun

La Distec SA ei in menaschi che lavura cun aulta qualitad e precisiun. Sia paletta da producziun sil sectur dall'elavuraziun da metal ei fetg gronda. Leutier s'auda era la montascha da gruppas da construcziun e la producziun da cumentas, la producziun da tocca resgiada cun CNC sco era prototips e serias pintgas. Sper la lavour cun materia usitada sco itschal ed alumini, elavurescha ella era material d'aulta qualitad sco invar e titan.